

明史彙

列傳第一百八十六

光祿大夫 經筵講官明史總裁戶部尚書加七級臣王鴻緒奉

敕編撰

四川土司下

播州宣慰司

安撫二長官六

永寧宣撫司

酉陽宣撫司

長官二

石碛宣撫司

遵義府卽播州秦爲夜郎且蘭地漢屬牂牁唐貞觀中改播州乾符初南詔陷播太原楊端應募復其城爲播所懷服歷五代子孫世有其地明初歸附置播州宣慰使領安撫司二曰草塘曰黃平領長官司六曰眞州曰播州曰餘慶曰白泥曰容山曰重安初宋大觀中楊文貴納土置遵義軍元世祖

授楊邦憲宣慰使賜其子漢英名賽因不花封播國公洪武四年平蜀遣使諭之五年正月播州宣慰使楊鏗同知羅琛總管何嬰蠻夷總管鄭瑚等相率來歸朝貢方物納元所授金牌銀印銅章詔敕賜鏗衣幣仍置播州宣慰使司鏗琛皆仍舊職改總管爲長官司以嬰等爲長官司長官七年中書省奏播州土地旣入版圖當收其貢賦自洪武四年始歲納糧二千五百石爲軍儲帝以其率先來歸田稅隨所入不必以額徵之九月鏗來朝置播州黃平宣撫司十二月播州江渡蠻黃安作亂貴州衛指揮張岱討平之八年五月鏗遣其弟錡來朝賜衣幣自是每三歲入貢不絕十四年命使齎敕符諭鏗比聞爾聽浮言生疑貳今大軍南征多用戰騎宜率

兵二萬馬三千爲先鋒庶表爾誠十五年城播州沙溪以官
兵一千人土兵二千人戍之改播州宣慰司隸貴州改黃平
衛指揮使司仍爲黃平千戶所十七年鏗子震以疾卒於京
命有司歸其柩二十年十月徵鏗入朝貢馬十匹帝諭以守
土保身之道賜鈔五百錠二十一年播州宣慰使司并所屬
宣撫司官各遣其子來朝請入太學帝爲敕國子監官善訓
導之永樂四年免播州荒田租設重安長官司隸播州宣慰
司以張佛保爲長官以佛保嘗招輯重安蠻民嚮化故也七
年宣慰使楊昇招諭草塘黃平及重安所轄當科葛雍等十
二寨蠻人來歸宣德三年昇賀萬壽節後期行在禮部議予
半賞帝以道遠勿奪其賜七年草塘所屬穀撒等四十一寨

蠻長官常徒等作亂聚衆二千餘人將攻牛場乾溪等堡事聞敕總兵陳懷勦之未幾懷招之復業正統十四年宣慰使楊綱老疾以其子輝代景泰三年輝奏湖貴所轄臻劄五空等苗賊糾合草塘江渡諸苗黃龍韋保等殺掠人民屢撫復叛乞調勦以靖民患帝命總督王來總兵梁瑤等會同四川巡撫勦之七年調輝兵征銅鼓五開叛苗賜敕諭頒賞成化十年以播州賊齎果等累歲爲患敕責川貴鎮巡官時輝將入貢巡撫以播地連諸蠻輝專守土難遠離帝命留輝十一月命輝子愛襲父職舊制土官襲職必三司先按實奏請而後許正統末苗蠻聚衆寇邊輝父綱不任職特命輝越制就襲至是土官同知羅宏奏輝有疾乞以愛代帝命愛襲職仍

敕愛卽率兵從總兵官勦賊先是輝奏所屬天壩干地五十
三寨及重安所轄灣溪等寨屢被苗蠻占據乞令湖貴會兵
征之命如輝言部議以愛年幼請仍起輝暫理軍事又以輝
難獨任宜敕都御史張瓚親至播州督理厲輝等振揚威武
以備征調其機宜悉聽瓚裁處十二年瓚督諸軍及輝攻敗
灣溪天壩干諸苗凡破山寨十六斬首四百九十六級撫男
婦九千八百餘口事下兵部以苗來撫者多宜量爲處分瓚
議設安寧宣撫司并懷遠宣化二長官司建靖南龍場二堡
命輝董其役輝調軍民五千餘衆立治所委所屬黃平土司
等分甃城垣將竣輝以聞因謂各寨苗蠻自區畫來頗知畏
懼但工竣後大軍還難保無虞播州向設操守土兵一千五

百人今撥守懷遠靖南天漂龍場各二百人宣化百人安寧
八百人其家屬宜徙之同居爲固守計其工之未畢者宜命
臣子愛董之而聽臣致仕如故詔從之時灣溪旣立安寧宣
撫爛土諸蠻惡其逼遂引齋果等攻陷天漂靖南城堡圍安
寧愛新襲力弗能支求援於川貴二鎮於是兵部奏起輝再
統兵勦之又敕川貴兵爲助十五年貴州巡撫陳儼奏苗賊
齋果轉橫乞調川湖等官軍五萬五千尅期會貴州聽儼節
制兵部言賊作於四川而貴州守臣自欲節制諸軍恐有邀
功之人主之且興師五萬以半年計須軍儲十三萬五千石
山路險峻輸運之夫須二十七萬衆況天將暑瘴癘可虞帝
然其奏二十二年刑部侍郎何喬新以愛爲其兄宣撫楊友

所許奉命往勘因奏楊氏據播已五百餘年蠻民服從久矣
奢僭淫暴之罪無代無之歷朝皆寬以文法治以不治今友
愛兄弟相許命臣等勘問果係情重當於本州監候則獄卒
皆其部下難於防守使移於重慶則道途遼遠蠻衆驚疑恐
生他變宜撫提二人面對虛實聽候上裁免其監禁爲便從
之二十三年喬新奏輝在日溺其庶子友欲令承襲長官張
淵阿順之安撫宋鞞謂楊氏家法立嗣以嫡愛宜立輝不得
已以職授愛又欲割地以授友謀於淵因以天壩千乃本州
懷遠故地爲生苗所據請兵取之容山長官韓瑄以土民安
輯日久不宜征淵與輝計執瑄杖殺之前巡撫張瓚受輝賂
以其地設安寧宣撫司冒以友任宣撫輝立券以所有金玉

服用莊田召諸子均分之輝歿淵乃與友潛謀刺愛淵弟深亦與謀不果友遂奏愛居處器用僭擬朝廷又通唐府密書往來私習兵法天文謀不軌事皆誣帝命斬淵深以愛信讒薄兄友因公擅殺且謀嫡盜官錢皆有罪愛贖復任友遷保寧羈管仍敕喬新從宜處治弘治元年增設重安守禦千戶所命播州歲調土兵一千助戍守七年以平苗功愛與有勞難加秩賜敕勞之十四年調播州兵五千征貴州賊婦米魯等正德二年陞播州宣慰使楊斌爲四川按察使仍理宣慰事舊制土官有功賜衣帶或旌賞部衆無列銜方面者斌狡橫不受兩司節制諷安撫羅忠等上其平普安等戰功重賂劉瑾得之踰年巡按俞緇奏斌不宜授詔裁之仍原職初友

既編置保寧愛益恣厚斂以賄中貴征取友向所居凱離地者獨苛同知楊才居安寧乘之朘剝尤甚諸苗憤怒凱離民爲友奏復官弗得乃潛入保寧以友還糾衆作亂攻播州焚愛居第及公私廨宇略盡遂殺才多所殘戮愛屢奏於朝帝乃命鎮巡官調兵征之會友死而川兵方調征盜遂緩師至是鎮巡官言友構亂罪大然其身已死其子弘尚幼今弘稍長能悔過自新且善撫馭蠻衆願聽其約束其前爲友所焚殺者俱已隨土俗折償且還所侵奪於官乞授弘冠帶名爲冠帶土舍協同播州經歷司撫輯諸蠻其家衆置保寧者仍歸之隸播州管轄并諭斌與弘協和不得再造釁端報可未幾播州安撫宋淮奏貴州凱口爛土苗婚於凱離草塘諸寨

陰相構結誘山苗爲亂乞賜斌敕令每年巡視邊境會湖廣鎮巡官撫處部議土官向無領敕出巡者諭斌宜撫綏土衆輯睦親族以副朝廷優待之意因加授愛爲昭毅將軍給誥命賜麒麟衣一襲時愛之子斌又爲其父請進階及服色禮科駁之以服色等威所繫不可假兵部以愛舊有勦賊功皆訐之旣而斌復爲其子相請入學并得賜冠帶十二年播州安撫羅忠宋淮等奏以宣慰楊斌有父喪欲援文臣例守制但邊防爲重乞仍令掌印理事初凱里土舍楊弘與重安土舍馮綸等有怨弘卒綸等誘苗蠻攻之更相仇殺侵軼貴州境巡撫鄒文盛言狀且請移文四川會官撫處踰歲不報文盛乃遣參議蔡潮入播州督致仕楊斌撫平之因言宜復安

寧宣撫俾弘子弟襲之斌未衰宜仍起任事以制諸蠻寨潮有撫蠻勞宜量擢兵部議安寧已革不可復斌子旣代亦不可起土官應襲與否屬四川非潮所得專盛所請難行而功不可誣十六年賜斌蟒衣玉帶嘉靖元年賜播州宣慰司儒學四書集註一部從宣慰楊相奏也弘旣死其弟張求襲父職不得時盜邊劫白泥司印信復與相搆兵守臣乞改凱里屬貴州以張爲土知州解釋之兵部議張習父兄之惡幸免於辜而敢肆然執印信以要挾當命川貴守臣按其前後爭產殺人諸罪宜於理若張悔過輸情還所獲印尙可量授一官聽調殺賊以自効倘或怙終必誅以爲玩法戒旣遂許張襲宣撫而改安寧爲凱里隸貴州初楊相之祖父皆以嫡庶

相爭梯禍數世至是相復寵庶子煦嫡子烈母張悍甚與烈盜兵逐相相走客死水西烈求父屍宣慰安萬銓因要挾水煙天旺故地而後予屍烈陽許之及相喪還烈斬地不予遂與水西構難并殺其長官王黻時嘉靖之二十三年也烈旣代襲遂與黻黨李保治兵相攻垂十年總督馮岳調總兵石邦憲討平之眞州苗盧阿項者亦久稱亂邦憲以兵七千擊敗之有言賊求援於播者邦憲曰吾方調水西兵聲揚烈助逆罪烈暇救人乎已擒阿項父子斬獲四百餘人初嘉靖初議分凱里屬貴州旣又以播地多在貴州境并改屬思石兵備及眞州盜平地方安靖播人以爲非便川貴守臣異議不決命總督會勘總督奏仍以播歸隸四川而貴州思石兵備

仍舊兼制播西平邑諸土司事報可隆慶五年烈死于應龍
請襲命姑子職萬曆元年給播州新襲宣慰使楊應龍敕書
八年賜故宣慰楊烈祭葬從其子應龍請也十四年應龍獻
大木七十材美賜飛魚服又復引其祖斌賜蟒例部議以斌
有軍功且出特恩未可爲比帝命以都指揮使銜授應龍十
八年貴州巡撫葉夢熊疏論應龍兇惡諸事巡按陳效歷數
應龍二十四大罪時方防禦松潘調宣慰土兵協守四川巡
按李化龍疏請暫免勘問俾應龍戴罪圖功由是川貴撫按
疏辨在蜀者謂應龍無可勘之罪在黔者謂蜀有私暱應龍
之心於是給事中張希臯等以事屬重大兩省利害豈漫不
相關者乞從公會勘無執成心十九年貴州夢熊主議播州

所轄五司改土爲流悉屬重慶與化龍意復相左化龍遂引嫌求斥蓋應龍本雄猜阻兵嗜殺所轄五司七姓悉叛離嬖妾田屠妻張氏并及其母於是妻叔張時照與所部何恩宋世臣等上變告應龍反夢熊請發兵勦之而蜀中士大夫率謂蜀三面鄰播屬裔以什百數皆其彈壓且兵驍勇數征調有功翦除未爲長策以故蜀無按竝王撫朝議命勘應龍願赴蜀不赴黔二十年應龍詣重慶對簿繫論法當斬請以二萬金贖御史張鶴鳴方駁問會倭大入朝鮮徵天下兵應龍因奏辨且願將五千兵征倭自贖詔釋之兵已啓行尋報罷巡撫王繼光至嚴提勘結應龍遂抗不出張時照等復詣奏闕下繼光用兵之議遂決二十一年繼光至重慶與總兵劉

承嗣等分兵三道進婁山關屯白石口應龍佯約降而統苗兵據關衝擊承嗣軍敗殺傷大半會繼光論罷卽撤兵委棄輜重略盡黔師協勦亦無功時四川新撫譚希忠與貴州鎮撫再議勦御史薛繼茂主撫應龍上書自白遣其黨攜金入京行間執原奏何恩詣綦江縣二十二年以兵部侍郎邢玠總督貴州二十三年玠至蜀察永寧西陽皆應龍姻媾而黃平白泥久爲仇讐宜翦其枝黨乃檄應龍謂當待以不死會水西宣慰安疆臣請父國亭卹典兵部尚書石星手札示疆臣趣應龍就吏得貫疆臣亦奉札至播招應龍當是時七姓惟恐龍出得除罪而四方以命竄匿其間又幸龍反因以爲利驛傳文移輒從中阻四月玠檄重慶知府王士琦詣綦江

趣應龍安穩聽勘應龍使弟兆龍至安穩治郵舍儲糈叩頭
郊迎致餼牽如禮言應龍縛渠魁待罪松坎所不敢至安穩
者恐墮安穩仇民不測之禍也幸請至松坎受事士琦曰松
坎亦曩奏勘地也卽單騎往應龍果面縛道旁泣請死罪請
治公館執罪人及罰金獻廷中得自比安國亭國亭者曩亦
被訐懼罪不出界故應龍引之士琦爲請於玠許之應龍乃
縛獻黃元阿羔阿苗等十二人案驗抵應龍斬以其族得論
贖輸四萬金助採木仍革職以子朝棟代受職次子可棟羈
府追贖黃元等斬重慶市總督以聞時倭氛未靖本兵欲緩
應龍事東方朝廷亦以應龍向有積勞可其奏於松坎設同
知治焉而以士琦爲川東兵備副使彈治之應龍獲寬益怙

終不悛尋可棟死於重慶益痛恨促喪歸不得復檄完贖大
言曰吾子活銀卽至矣擁兵驅千餘僧招魂去分遣土目置
關據險厚撫諸苗名其健者爲硬手州人稍殷厚者沒入其
貲以養苗苗人遂願爲出死力二十四年應龍殘餘慶掠大
阡都壩焚劫草塘餘慶二司徧及興隆都勻各衛又遣兆龍
圍黃平戮重安長官家勢復大熾二十五年應龍流劫江津
及南川臨合江索其仇袁子升縋城下磔之時兵備王士琦
調征倭應龍益統苗兵大掠貴州洪頭高坪新村諸屯已又
侵湖廣四十人屯阻塞驛站訶原奏仇民宋世臣羅承恩等
挈家匿偏橋衛襲破之大索城中戮其父母淫其子女備極
慘酷二十七年貴州巡撫江東之令都司楊國柱部卒三千